

**Siunnersuut uunga: Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaat nr. xx, xx 2012-imeersoq**  
(Nunamut Namminermt, Pinngortitamut Avatangiisinullu Naalakkersuisoq)

**Akissuteqaat**

(Nunamut Namminermt, Pinngortitamut Avatangiisinullu Naalakkersuisoq)

**Aappassaaneerneqarnera**

**Aallaqqaasiut**

Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsiissaannut Inatsisinut Ataatsimiititaliaq sukumiisunik suliaqarsimaneranut qujavunga.

**Inatsisinut Ataatsimiititaliap aappassaaneerneqarnissaanut isumaliutissiisutaa**

Inatsisinut Ataatsimiititaliaq isumaliutissiisummini sisamanik innersuussuteqarpoq suliap ingerlateqqinnissaanut Naalakkersuisuni suliarineqartussanik.

**Kommunimut qinersisinnaatitaanerup killilerneqarnera pillugu**

Inatsisinut Ataatsimiititaliap isumaqatigiittup qinersisinnaatitaanermt piumasaqaatit ullumikkut atuuttut ingerlateqqinneqarnissaat kissaatigivaa. Tassunga atatillugu ataatsimiititaliaq allannguutissamik siunnersuummik saqqummiussaqaarpoq. Naalakkersuisut allannguutissatut siunnersuut tusaatissatut tiguaat.

**Sumiiffiit sinniisuutitaqartinneqarnerat pillugu**

Ataatsimiititaliami amerlanerussuteqartut IA-meersut Siumumeersullu nunap sumiiffiini sinniisuutitaqartinneqarnerup ingerlateqqinneqarnissaa kissaatigivaat, soorlu tamanna Naalakkersuisut siunnersuutaanni siunniunneqarsimasoq. Taamaattoq amerlanerussuteqartut isumaqarput sumiiffimmi sinniisuutitaasup qinigaanini annaassanngikkaa kommunerisami iluani nuukkaluaruni. Amerlanerussuteqartut tamanna pillugu allannguutissatut siunnersuummik saqqummiussaqaarput.

Naalakkersuisut Inatsisinut Ataatsimiititaliami amerlanerussuteqartut IA-meersut Siumumeersullu allannguutissatut siunnersuutaat tusaatissatut tiguaat.

**Innuttaasut nunatta avataani najugaqarallartut qinersisinnaatitaanerat qinigaasinnaaneralu pillugu**

Inatsisinut Ataatsimiititaliaq isumaqatigiittoq allannguutissatut siunnersuuteqarpoq § 5-imi inuit § 2 naapertorlugu qinersisinnaatitaasut aamma qinigaasinnaalersinneqassasut.

Naalakkersuisut allannguutissatut siunnersuut tusaatissatut tiguaat.

**Najukkani siunnersuisoqatigiit pillugit**

Soorlu Inatsisinut Ataatsimiititaliaq isumaliutissiissummini allattoq Naalakkersuisut 2013-imi upernaammut Inatsisartut ataatsimiinneranni kommunit aqunneqarnerat pillugu inatsimmut allannguutissatut siunnersuuteqalersaarput.

Naalakkersuisut suliap ingerlaqqinnerani Inatsisinut Ataatsimiititaliaq kajumissaarutai najukkani siunnersuisoqatigiinnik pilersitsisinnaanermut tunngasut isumaliutinut ilaatilersaarpai tassungalu atatillugu isummerfigalugu najukkani siunnersuisoqatigiinnik aaqqissuussineq pitsaanerpaamik qanoq ilusilerneqarsinnaanersoq aamma aningaasalersorneqarsinnaanersoq, matumani aningaasarsiaqartitaasinnaanermut periarfissat ilanngullugit.

Taamatut oqaaseqarlunga Naalakkersuisut sinnerlugit oqaluuserisassaq Inatsisartunut suliaassanngortippara.